



做媒人

老古人言講：「男大當婚，女大當嫁；不婚不嫁，鬧出笑話。」年紀到自然就愛嫁討，可見「結婚」个人生大事，毋單淨重要，還愛辦到鬧鬧熱熱、風風光光。人講：「有賒豬羊，無賒新娘。」頭擺个時代「有錢斯婚姻早、無錢斯等到老」，憑媒六禮、聘金桌席，項項就愛使錢，家世係無底，後生仔就愛煞猛打拚長兜錢，正好做槓送定討舖娘。

媒人愛尋上有高堂康健，下有子女聰明賢孝个好命婆、好命公。頭擺媒人算係一種職業，看親扛茶、送日課、定婚結婚，逐位个風俗禮數，對頭到尾項項斯愛知。頭過講愛門當戶對，這下自由戀愛「看對頭，毋看門樓」，該乜愛請個親戚做便媒人，有禮俗程序正毋會失人禮。

記得頭一擺做媒人，係偌大伯討心白，雖然禮俗偌略略仔知，毋過雙方都係學老人，盡驚失禮數，請教有經驗个老人家，各種禮俗過程摻 但客人乜大約相同，好得雙方親家簡單儘採，也好得後生人逐項準備到好勢好勢，偌這個便媒人對講親定婚到結婚，已輕鬆圓滿。第二年大娘姑嫁妹仔，乜請偌做媒人，照理講媒人係男家頭个親戚做，毋過男家頭係香港人，在臺灣定婚請人客，愛照 但臺灣禮來辦，媒人自然愛請臺灣人。聽講在香港定婚个六禮、大餅、聘金一概用隻大紅包託，一來簡單便利，二來恁多个微毛末節，女家頭自家主意。總係 但係臺灣人，定婚愛分女方个親戚朋友見證祝福，男家頭還係愛大餅六禮送定，新娘乜愛扛茶戴禁指，隆重个定婚儀式，偌這個媒人个四句仔講到新親戚歡喜露天。

老頭擺人講，媒人愛做三擺過，係無下世人个職業係牽豬哥，偌想這係頭擺个人重視男大當婚女大當嫁个觀念，希望媒人多多牽成後生人个婚姻。時代改變，後生人有自家个打算，去公證結婚簡單又省事。不管哪種方式結婚都好，斯愛兩公婆和和妥妥過日仔，雙頭到老圓圓滿滿。

作者：李夢花

☆詞彙學習☆

【憑媒六禮】pin moi liug li`：男方在訂婚時給女方的六樣紅包禮。

【長兜錢】diong deu` cien：積攢一些錢。

【槓】chang`：喜慶或喪事時用以裝禮物或牲品的木製器具。

【扛茶】gong` ca：相親、文定時新娘端茶給新郎喝。

【送日課】sung` ngid ko`：將訂婚、結婚的日子送至女方家。

【便媒人】pien` moi ngin：現成媒人。

【失人禮】shid ngin li`：失禮。

【四句仔】si` gi` er：婚禮時祝福新人的吉祥話。

【歡喜露天】fon` hi` lag` tien`：形容欣喜異常非常高興。